



LE GOUVERNEMENT
DU GRAND-DUCHÉ DE LUXEMBOURG
Ministère de l'Enseignement supérieur
et de la Recherche

Le Ministre

Äntwert vum Minister fir Héichschoul a Fuerschung, Claude Meisch, op d'parlamentaresch Fro Nr. 8056 vum honorabelen Deputéierte Sven Clement

Et sief am Virfeld vun dëser Äntwert op dem honorabelen Deputéierte seng Froe betreffend d'Traitementsdauer vun den akademeschen Unerkennungsdemandë vun auslänneschen Héichschouldiplomer preziséiert, dass déi hei drënner genannten Zuelen staark approximativ sinn, opgrond dovunner, dass den aktuelle Gestionsprogramm vun dësen Demanden net drop ausgeluecht ass, esou eng Statistik opzestellen. Et ass och wichtig ze betounen, dass am Prinzip den Delai vun der Traitementsdauer eréischt uleeft, wann den Dossier bis komplett ass, während an dësen Zuelen och den Delai zwëschen dem Areche vun engem onkompletten Dossier an der Vervollstännegung vu Säit vum Demandeur mat abegraff ass. A finalement sief nach drop opmierksam gemaach, dass et sech bei dësen Donnéeën ëm Kalennerdeeg an net ëm Schaffdeeg handelt.

An de leschte fënnef Joer louch déi global Moyenne vun der Traitementsdauer vun den akademeschen Unerkennungsdemandë zwëschen zirka 21 a 45 Kalennerdeeg, woubäi déi duerchschnëttlech Dauer fir EU-Diplomer sech zwëschen zirka 18 an 41 Kalennerdeeg situéiert huet, an déi fir Net-EU-Diplomer zwëschen zirka 29 a 54 Kalennerdeeg.

Déi duerchschnëttlech Bearbechtungsdauer am éischte Quintil läit dobäi konstant bei ongeféier enger Woch an déi am leschte Quintil situéiert sech zwëschen 2,5 an 3,5 Méint.

Dee kierzte Bearbechtungsdelai variéiert, onofhängeg vum Joer, tëscht engem Dag an enger Schaffwoch. Dëst ass de Fall, wann et sech ëm een äusräichend bekannten Ofschloss handelt, an d'Agente vum Service Registre des titres vun den Demandeure fréizäiteg drop opmierksam gemaach ginn, dass et sech ëm eng justifiéiert urgent Demande handelt, déi kruzial ass, zum Beispill am Kader vun engem Recrutement.

D'Waardezäit ass par contre méi laang, wann déi serviceintern Recherchen, wat den Unerkennungsstatus vun der Héichschoul an dem Diplom ubelaangt, net concludant waren, an deemno ee (leider net ëmmer rapide) Retour vun der concernéierter Héichschoul bzw. vun de kompetenten auslänneschen Autoritéiten ofgewart muss ginn. Och spillt d'Period vum Joer, an där eng Demande agereecht gëtt, eng Roll, an deem Sënn, dass zu gewësse Momenter de Service Registre des titres eng bemierkbar gréisser Unzuel vun Demandë receptionéiert. Selbstverständlech sinn, trotz dësen externe Facteuren, d'Agente vum Service Registre des titres beméit, d'Waardezäit esou kuerz wéi méiglech ze halen a gläichzäiteg eng fundéiert a prezis Unerkennungsdecisioun ze treffen.

Déi prozentual Unzuel vu refuséierten akademeschen Unerkennunge läit zimmlech konstant zwëschen 5,3% a 6,2% pro Joer. Den heefegste Grond fir d'Refuséiere vun Demanden ass kloer deen, dass et sech ëm een Diplom handelt, deen am Land, wou en ausgestellt gouf, net vun den zoustännegen Autoritéiten als Héichschouldiplom unerkannt ass.

Eng Verkierzung vun den Delaien ass natierlech wëschenswäert a gëtt och aktiv ugestrief. An dëser Hisiicht gouf an de leschte Joren de Service Registre des titres personaltechnesch opgestockt. Och vun der ustoender Digitaliséierung erwaarden ech mir mëttelfristeg ee positiven Impakt op de



Bearbeitungsdelai vun Diplomuerkennungsdemanden. Serviceintern gëtt och lafend no Méiglechkeete sondéiert, fir d'Gestioun vun den Dossieren nach méi efficace ze gestalten.

Weiderhi steet natierlech och konstant déi qualitativ Amélioratioun vum Traitement am Fokus. D'Verstärkung vum Service Registre des titres erméiglecht et deemno de Mataarbechter, selwer méi déifgrënneg Recherchen ze maachen, an dat besonnesch bei eeleren, haut net méi ausgestallten Diplomer, souwéi och bei Diplomer aus Net-EU-Staaten. Speziell a méi komplexe Fäll huet dëst dozou bäigedroen, dass den Traitementsdelai reduzéiert gouf doduercher, dass d'Unerkennungsdecisioun manner un engem Retour vu Säite vun der betraffener Héichschoul oder de kompetenten auslänneschen Autoritéiten gehaangen huet.

Et sief an dësem Kontext ofschléissend ugemierkt, dass gewësse Fäll allerdéngs och weiderhin en onkontrolléierbaren Afloss op den Duerchschnittsdelai wäerten hunn. Heibäi handelt et sech ënnert anerem ëm den Delai tëscht dem Areeche vun engem onkompletten Dossier an der Vervollstännegung duerch den Demandeur, mee och ëm den Delai, deen ufält, wann eng onëmgänglech Informatioun bei enger Héichschoul oder bei auslänneschen Autoritéite muss nogefrot ginn.

Lëtzebuerg, de 15. Juni 2023

De Minister fir Héichschoul a Fuerschung

(s.) Claude Meisch